

呂
子
評
語

呂子評語餘編卷二

黃葵陽稿內摘錄

按先生文凡三變。初爲渾灝踔厲驚世之文。嘉靖辛酉甲子閒。風氣冗弱。茅葦彌望。先生與同里趙玉虹獨勉爲古學。救之以精鍊典則。會隆慶改元。釐正文體。遂以第一人舉於鄉。辛未後文體復振。皆先生力也。庚寅歸里。與門生子弟論學不少倦。而文益簡淡高遠。今集中所載多後兩變作。

先生之文。上裁嘉靖以前之迂蕪。下截萬曆以後之俚怪。酌乎古。不入乎時。三百年文運之正中極盛也。編修時疏正文體。謂必先端士風。士風倒瀾。欲正無由。因陳六事曰。去浮靡。止奔競。明是非。禁佞諛。禁黨錮。禁清談。啓禎閒事無不灼見。嗚呼。誠得行其言。豈止文字無末流之禍哉。以上目後跋識

上下照應之法。至先生乃精。成弘之所未有也。然皆於實理發揮。自然照應。是爲天巧。慶曆以後。乃求之詞句間。至反屈本義以就之。則悖亂矣。

凡扼要語。爭道理精實。不爭語句濶大。

生財有大節文云云。自論文者以圓渾爲宗。則優鄧宜矣。然此是自將時文放低。不入古今文體論耳。若以正法眼觀之。道理真氣象大。法律高。手筆古。豈有出黃上者乎。試再讀鄧作。自覺容悅之意多。大人之風衰矣。真讀書者自辨之。此非時文小事也。

小講古人直入上脈。不爲全題巴攬。其法極高。今人定要說盡。似有法而實非法也。

上下縈迴一氣。其中綫索絲毫不斲。金鍼在理不在法也。然法斯

精密矣。

文貴潔靜精微。然精微不真，則潔靜亦假。故行文鍼線，只在看書時見得道理瑩貫處便是。若謂繡鴛外別有不度與人法，直是瞞天誑語。

作者之文，其精神與題意相副而止。莊子所謂不疾不徐，有數存焉於其間，斯幾于化矣。陶鍊既精，其精神跌宕，皆古文之自然，不可以工拙長短相形，似于天馬也。

士不可以節文

云云

宋羽皇

二句語勢呼應甚緊。上下俱著實不

得，**節**因謂上下俱著實不得，故近文多用空調架過，其所謂著實不得，以有下節也。然下節只礙重遠，不礙弘毅。則第一句未始不可著實也。卽第二句不宜說如何重遠，然重遠之所賴乎弘毅，仍未始不可著實也。竊謂書中總無著實不得題目，都被

一粗心人輕易立論所誤。讀此應悟。凡題目自有箇著實而不礙處。大家正於此見神通耳。

文字論法度機神。猶是古人皮毛耳。古人難及處。却在命脈。識得命脈。講來方有歸宿。

文十 朴直不費力。先輩好處。皆今人所不屑爲也。而今人不及先輩亦在是矣。**文**須知朴直二字。亦對今人言耳。此正古人之巧妙也。今之巧妙。乃古人所不屑耳。

後來講提綰鉤渡。費無數小巧伎倆。非穉卽鑿。不則節外生枝。看古大家作截搭題。只消順文直行。而未嘗無照應攔絕之法。此文字以自然大雅爲第一流也。

每比各有義。無一義複合而節次相生。極開合反側之法。亦無一法板湊。古人于一句題。變化精密。不可叵測。若是只是意思多。

道理實也。

凡爲吉祥冠冕之說者。其文必膚鄙。其人必佞柔。正君子之所謂不吉祥冠冕者也。

逐節過脈。用意都在上截。落下如錦機一片。不見梭扣之迹。此法先民所未講。自先生始精。

脫然心口之間。了無難處。此是道理到熟時也。

後人攀躋不上處。止是道理說到極平實。滴滴落窠槽耳。

玉荆石雅淡中帶沉著。惜也。才情俱盡。探之易窮。**邵**此陶柴桑詩。似稿而實腴。李營丘畫似簡而實厚。鍊丹成黍粒。鑄劍作香丸。候也。荆石之云。徒見其本領不濟。

有理有事。有情有景。有敘有論。有聲有色。有照有用。數者一滾流出。摘之無所不備。按之不見其迹。官欲止而神行。作者亦不自

知其所以然。文至此化矣。

頓挫泳歎。淫汰深長。此西漢文字之妙。歐曾得之。加澶漫耳。

看得此理無纖芥之疑。如自己胸襟流出。詳略轉折。悉當其分。其閒忽用一二筆襯節點掇。更覺分明有神。此大程子說詩之妙也。

民事不可節文云云。**楊維斗**句字多照全章。意有餘於題外。**錢吉**

士先輩作長題。不用提掇照應。然或失之太直。萬曆中季以提掇照應爲工。失之太曲。近日失之太亂。調停古今。此可爲法。**詔**楊錢二評善矣。又須知其照全章。若不覺其照全章。提掇照應。若不覺其提掇照應。但順題發義而已。細按之。知其用意深處。近日沾沾于照下提掇呼應。誇得法。標題吆喝。惟恐人不知其所爲者。及按本文。却全無意味。此非先輩之所謂法也。

末流論法。只在分股立柱。挨次陵駕爭高下。此猶是牝牡驪黃之
相也。古作者之法。却在精神貫注。一片空行。於無可蹤跡處。自
立綱宗。如高祖入淮陰軍中。更置部署。雖多多益善者。失却兵
符在手。此自在兵法。非諸君之所知矣。

小題布置生發之巧固矣。而尤難其典雅醞藉。今文卽有其心思。
不得其學問運用。開口便俗。徒增醜耳。

金正希稿內摘錄

崇禎初一變爲古文之學。多以馳騁沿循雄深蒼勁爲勝。先生獨
於簡嚴淡靜中自出奇詭。令人一望不易入。久而心爲之移。又
迷離而不能出。此先生之超越一時者也。

文評 正希舊文稍遜近作者。少渾灝之氣耳。乃知古文以氣爲
主。評文氣隨理變。先生文俱從刻削而得。初時所見之理。依傍

儒門故繩尺謹嚴而于儒之精微未盡故氣亦澀縮後通宗門旨趣文亦縱逸不可控制然其弊病亦不小矣千子止解文氣故其言然耳吾謂古文之氣必以理爲主

艾千子湘洲以縱橫家見長微雜禪鋒視正希殊異吾終不以彼易此評但涉禪鋒必以縱橫見長本是一家眷屬正希先生最精于此湘洲不及耳千子之云適爲正希笑其被瞞也

小講下每用散行數筆卽徑點全題正希好用此法然有出奇處亦有突盡處須相體用之

夫子溫良句文云云評題有正面認真平衍不得者若從夫子呆寫五者轉落以得之未免犯權用又須于語外洗出不關權用一層雖有刻畫轉見支離竟向邦君心目中看出夫子向旁觀心目中看出邦君心目中夫子五者之妙都在得字中映出四

而貌取全神。盡是畫相邊事。儘著神通。於聖人本位端然不動。此卽蓮華色比丘止見色身。不若須菩提巖中晏坐。却見法身也。

其描寫空虛撰狀不可名言意象。是第一種妙手。

維斗云。正希之文。俱是以題還題。而隨筆曲折。則議論波趣。亦因之以生。如夏雲奇峯。頃刻數變。春水縐縠。波紋愈遠。最善形容其文境。

雄剛之氣。却能出之澹遠。故奇。一著浮囂粗莽。便不成氣質。

艾子謂用子書有迹。便誕而腐。用史書有迹。不妨爲拙老。史根秦漢。子雜六朝。其質異也。余以爲未當。史失之粗。然尚實。子失之悖。多虛妄。不經以理異故耳。

艾子

古不足羨。羨其所謂古。非今人抄經撰子以爲古也。古而

奧不足羨。羨其所謂奧。非今人浮誕險澀以爲奧也。一種淡處曲折處。吾所服膺。語古而奧也。淡與曲折也。俱不足爲正希贊。卽有勝人。亦止是皮毛上等第。相去只有有限。須得其至意直流處。不肯爲擺設體面之言。所謂心不負人。面無慙色者也。

正希自云。無有高妙處。但俗氛得片時不來眼前。吾以爲俗氛亦隨人意見。正希所指只是時文混帳套頭。其爲俗氛也醜而易見。若和尚講語之俗氛。旣腐且俚。開口便腥穢。正希又自不覺也。

艾千子正希文痕迹盡化。整齊之中。時出不整語。學者當觀其氣勢旁薄渾雄處。不必以解題銖兩處繩之。語文必理爲主。而文氣足以達之。乃爲至耳。今但以其文氣佳。而反不必繩其解題之謬。抑何悖且陋也。卽論文氣。所謂磅礴渾雄自在神骨神骨

誠磅礴渾雄如震川文板板作排偶體未嘗不古文今但以其單行不齊整處指爲古文老手卽離理論文亦陋之陋者矣此最易疑誤後生不得不辨

宛曲題文須宛曲以肖之固也然多學婆子舌頭以折腰褻頸之態吐麻糊綿軟之聲無論聖賢氣象卽古今文人才士亦必無此沒骨頭猥狀正希文曲折回斡如絲絃蜿蜒蘆葉閒出沒風雷都是神龍變化

凡一語徑了者白語不放之了而其上下中邊乃無所不了極刻折中自具清微疎雨梧桐微雲河漢于此境領取其微

藥滿空山難尋行迹松際微月清光爲君不必更作奇特留連詠歎中令人不能自已此文情之妙也

理淺而意致極高從莊子得來

言卷二
惘然不盡。是莊子妙境。

漢魏齊梁追琢光華。極其古豔。然纔著此相。卽減却品地。故文字以本色爲至也。

他人精彩。標騁眉目。開。惟恐人之不盡挹也。獨正希先生不肯令人淺測。巉之削之。闕之固之。幽潛之中。其光鬱然不可弇。斯亦文章之一奇也。

開端邈然有意不盡。最高之境。

題之搭合。本無義理。做作便成穿鑿。所謂生薑樹上生。只得由他說耳。然義理精熟人。說來定合自然。其餘各就所見發洩。

文最不易得。賓主關照。四平八穩。今人乃以粗疎爲大家。武斷蠻做爲古文。不怕深山窮谷。大有人笑倒耶。

德節文

云云

評敘記體須有此排列。時手怕平板。輒用總筆帶。

過自以爲高。不知正是沒本事也。先輩用史漢法力。正在平板處出色。後人不能爲矣。

風號雨溢。海嘯山崩。皆助其輪囷鬱勃之氣。不作悲涼處。是十分悲涼。予長千古擅場。只是會得此情致耳。

正波後又起一遠波作結。是古文深致。亦自史記來。

子張問士章文

云云

評

全副精神都用在前三節。此處精神迸透。

以下堆垛盡如落葉微雲。隨風消散。是多少灑脫。灑脫便灑脫。却只得走空伎倆。到先輩樸實頭地。不覺磕著粉碎。此正希平生得力處。正是他不濟處。又不可不知也。

思致斷露。不隔絲塵之翳。而筆頭靈變。步步勾留掩映。故極露處。越包而有不盡之味。

正希之文。每以轉爲曲。以曲爲圓。他人之圓也。熟斯其圓也。生熟。

則俗。生則古。一從古文出。一從講章時文出也。然他人學爲生。則野。斯其生也醇。一從古文自然得之。一則仍以講章時文之。枵腹而貌爲古文也。

尺幅謹嚴。其中丘壑頗耐登臨。只是法密意精。法密則意有根據。而生發不竭。意精則法有附麗。而變化從容矣。

以古大家手段。行先輩挨講如題之法。安帖中皆有不可控勒之勢。不可方物之思。此妙惟震川獨步耳。正希乃與之爭席。後生不知法度。或粗知死格。而不知有真趣妙境者。不可不讀此種文字。

自全局以至段落。股法句字。無一不堅鍊老辣。如名將結寨處。雖溝柵樵汲之細。皆有精意。然只此四字中。亦帶得已攬俗氣。此是萬曆後名家流毒。深於文者自知之。

俗調常從老鍊太過來。

正希文必有開闢之區。令人目瞶魄動。終不奈許多禪何。正說處又忽然敗露馬脚耳。

其至性懇摯。必破膽出血。不肯爲皮毛冠冕之詞。顧太求激越處亦多過頭語習氣。

今人亦好講婉曲。然心思不靈巧。手筆不奇矯高脫。祇成婆子舌頭一味軟俗而已。正希文婉曲。直是龍變絲弦。劍飛白練。

蕭蕭散散。自具清微之趣。如與江左諸賢塵尾相對。雖名理不入聖域。然不得下世路商量。

輕置正面。從對面旁面別出新意。令觀者於尋常巷陌中忽開靈境。其弄奇討好處在此。然其本事不及先輩亦在此。後來才人得此方便。儘有生發。然手筆之高古。思路之幽邃。又不可得矣。

氣骨蒼峻。手法變活。文格至此。已不勝其高。惜乎原頭不是。動輒走作耳。

他人爲古文。皆貌爲粗硬而已。能以雄悍之骨。蜿蜒妥帖于行閒。無不如其意之所欲爲。而未嘗有不關之笱。不密之縫。則正希其至乎。

題苦于闕濤蒙曼。入正希手。不覺眼前空曠。行處自在。亦是瀟灑有得之樂。故凡有題。能窮我者。皆當於見識上求出路。道得明暢圓利。此熟極能脫時妙境。不可以揣摩到也。

洞民生之細微。得國計之弘達。方是名儒經世有本有用之文。秀才時不具此等器識。下梢只成鄙夫耳。

其心精所注。能使無堅不瑕。真文中之虎也。惜其自瑕處。却在好爲異說。若肯依正說。豈不更勝耶。蓋一時習尚如此。雖賢者不

免也。

禪者指道學爲腐。不知腐正禪之病。禪必去語言文字。然又不得不用。雖極力造奇。然畢竟無知言之功。視語言文字皆極粗。故隨手拈用。無非淺鄙。淺鄙斯腐矣。勿枉誣道學也。

文至正希真。可謂直抒所見。自由自在。不可捉搦矣。惜理不精耳。其不精者。乃其所自以爲極精。而不屑爲此閒之精者也。然不精正在此。

其精爲江西者。其粗必爲永嘉。此一家眷屬也。

艾千 場中能矜重典實。盡洗鉛華。非老手不能。然主司大半漸染時趨。安能識清古高質之文。不足責也。**呂** 被千子罵殺天下主司矣。然則文不可清古高質耶。如正希又何嘗不遇世閒畢竟清古高質者少。良主司正苦未覩耳。

艾子文章之道求深乃淺求奇乃平。若夫淺而愈深。平而愈奇。吾子正希見之。歐公所云漢人之文。能以文言道。世事。嗟夫。既謂之世事矣。世人安能以文言道之。如漢人哉。**語**求深者。乃真平淺。此精于論文矣。顧所謂以文言道。世事也。須知世事之有王有霸。有古有今。有聖有庸。豈可見叔孫之綿蕤。卽稱三代王會。魏晉五代之受禪。儀注。卽頌舜禹天命哉。戊辰以後。文日高古。論者乃謂文字不足關世事。不知此等處不辨。直與聖學相悖。謬而不知。雖高古適成亂亡之音耳。

莽莽蒼蒼。提筆直走。其中奧區幻境。無非妙用。若不知有界畫。而界畫極森嚴。于子且爲所欺。可知其變化狡獪矣。

善用蹴踢之法。便使題中節節見精神。結末寬閒有餘地。然講蹴踢。便自有俗法。求古秀靈變爲難耳。

以縱爲攻以鬆爲刻寬下網逐步收攏來此是嬖佞行讒祕傳文人卽得之爲逼題妙法。

殺人只寸鐵解牛只芒刃作家得手無多子直是運用不窮彼弄刀鎗靠椎斧者越多越不濟事。

當窮之時節云云評看文字當得其大處如斯文看其結構極奇濶而鍼線又密對仗極精工而變化無痕凌駕極超脫而鋪敘不苟氣勢極浩直而曲折無窮真文章之雄也若其滑稽擊刺處雖極雋快故是遊戲小道耳賞識落此必轉入謔浪尖酸一路是亦作家之滲漏不可不察其流也。

凡得力於古文則變通有法必無束手坐困之事。

名手作諧談亦尚有雅趣不似近人俚鄙竟是街頭乞錢語。

有進而退三句文云云評入今人手未嘗不淋漓花簇盡情痛快。

然終是熱鬧處見長無此冷峭意味。要之能熱鬧而不能冷峭便是那一邊人物種子。文品卽是人品。看此文可想見其氣象矣。

凡虛位能實發又不攘奪。只是理多而心細耳。人謂其落想如萬弩齊發。予謂當翫其挽強引滿。不肯輕動弩牙時。當之者自須山摧城陷。

意著而語不著。神理悠然無窮。此是法外法。小可未易語此。空靈空渺。曲屈盤旋。只如家常白話。此最是文章上乘。然不從漆園老子得來。亦徒爲村嫗之白話矣。

千子云。釋氏如宗鏡錄。華嚴論。皆六朝文字。一義須數十句乃可了。堆疊踳躐。婆子舌頭。安得以吾輩歐蘇之筆言其理而出之。簡易直截。讀之明快。觀正希作。吾所望者有屬矣。又云。微言妙

理當求之如來諸大部中。千子頗詆以禪學爲文者。而斯言又如是真可怪也。要之渠只曉得禪不可入文耳。原不曾曉得他道理不是。此一派識見最多。也不止千子。

比典體最忌著想刻煞。故極意生發處。俱要包裹于吞吐宛轉間。得掩映逗漏之妙。

鄉黨第十一段文云云。雖多粗滓浮硬之病。然沙礫中正有真金在。廼先生節義命根也。同時許多修飾秀美者。真同糞土耳。驟而卽之。若不平淺淺耳。經人百思而其味愈厚。其用力都在人思路三四層後。故從皮毛尋之不遇也。遇及時。他裏面游歷不盡。

正希真得禪肆。其文刻鷲英雋。如毒龍餓鶻。又當於格外賞之。如看莊子。不得以理廢也。

不無砂礪剝蝕。要其精光難掩。望氣者夜中自能識之。斯爲真金耳。

黃陶菴稿內摘錄

學而時習節文云云。文境殊清蒼。思力亦果銳。不向人家笆籬邊拾取狼藉之物。真作家氣魄也。也惜被本心之說所誤。與聖學不相比附。程子所謂本領不是一齊差却。後有作者。不可不慎也。

文無經學。則議論無本。雖鋪設夸辭。不過奄寺之頌美。吏胥之謀猷而已。本之經矣。而不熟于史。則于成敗得失之故。人情物理機勢之變。不能發摠明快。惟先生兼攬其勝。

明於事理者。語不必多。自能深中要害。所謂曉人當如是也。攀古今臚件繫說來說去。祇是頭巾膚殼話頭。聽之多少瞌睡。

活套捷法必不可得。

作君子矜而不爭等題。便可想見其人之胸懷體段。韓子謂仁義之言藹如。有一分仁義。見一分英華。二者有偏勝。則其言有剛柔不能借。不可掩也。俗人于此。大都亦作和平酌劑之論。然所流露者。祇得其浮僞圓融軟美而已。畸行者則又多傲岸過高之思。惟端人正士。其光明俊偉洋溢楮墨間。雖圭角有未化精微有未盡。所言不無粗處。則視所見之淺深。所養之厚薄。要之非流俗所能有矣。讀陶菴文。自見斯意。

一氣渾浩流轉而出。不設欲俳欲散之意。天然雄深峻厲。題面安頓。他人費盡老力。却變化于起滅轉摺之中。立泰華之巔。俯視人間。雲雨雷電皆在脚下。斯亦壯觀也。

雖詳於史鑑而不深達治理。則不能爲體要之論。達治理矣而不

透人情。則雖淹核明暢。而不能使人刺心動魄。此陶菴史學之精也。

原批理致題。非幽微深妙。卽當明白顯快。然微妙者畢竟不如明快爲上。**評**要知明快原從幽微深妙翻得出耳。若無幽微深妙。便不成明快。

文至情理真切處。雖房老可曉。雖聖人不易。自是不朽。

節彼南山之節文云云。**評**如是文。安得謂非古文。不足繼歐曾大蘇之後耶。故凡爲時文不傳之說者。必于此事不通。不能而謬自託于古文。要先不解古文也。

秦國節文云云。**評**當先生之時。門戶之關正烈。妨賢害國者。以詐忠要主。眷其攻之者。又多以傾軋爲事。先生蓋借題以抒其憂憤。故異常剴激雄快。其結構拗捩。又自變滅不測。此氣生

于情者也

先生文開合甚大。不斤斤于一二句上討人喝采。故知其用意者希。

起收轉側。出沒回翔。皆有大氣運旋其中。使天下好論頭大套子。吉祥富麗詞句。皆屏置不敢疥其行閒。自熙甫以後。久不見此體段矣。

評家謂陶菴每於貞邪消長治亂倚伏之間。搜隱捕微。不遺餘力。足以知其志之所存矣。凡爲文能具此心此手。又何時文古文之分耶。

陶菴自謂其文如說書。此有讚有罵。何謂讚先輩之文。如題起訖。言簡理足。不增不減者是也。此言理如說書。原無說書聲口者也。何謂罵講章一派。起於元儒盛于正嘉之間。如世俗所稱蒙

存淺達之類。拘牽破碎。影響皮毛。於聖道毫無所見。而自附傳註之宗。其去漢唐訓詁已不啻萬里。至若時下坊刻所行說約等書。直是末等魔障矣。何以文爲。陶菴文如譏者。則尚未敢相許。如罵者。則文氣高雅。亦萬不至是。看來自評不切。其所謂說書者。要只在貫穿過遞結構上講耳。此是行文機巧。非說書法也。說書高下。只在理真不真處分取。

陶菴於典制文。好補題外事例。以示博辨。固多昔人未發之蘊。然於旁義生枝者。於本論必不盡。先輩所以不貴是也。

文章貴體。體視氣。氣視理。惟多讀書。講究自得之。不可于詞調間求速化之術也。纔求速化。卽落卑賤惡俗之派。無體可言矣。

陶菴文議論駿偉。經生從何摹仿。曰不難。多讀書自會。

長章題緣路結營。隨方布陣。勢到則變幻自生。不復有烏蛇龍虎。

之迹。看其鎔鍊之妙。每令題目化於行閒。何處更覓渣滓。他人以假古文湊題目。生吞硬嚼。中氣空虛。不能蒸腐運用。徒見其完穀不化耳。

閒中公案。指出妙義。是古文逸處。

戰國之刻峭尖雋。無秦人之雄厲。則不大。無漢人之寬閒渾浩。流轉則氣脈不高深。

讀書識大體。故典麗中風骨嶷然。此大臣氣象也。其起伏瑣結。法律精明。而從容閒暇。丰采煒煌。真有天神之度。

時文手學古文。只苦猥近軟便。無可脫變處。古文手爲時文。又苦硬盤直放。佞伉不相入。道是龍。又無角。道是蛇。又有足耳。力量如陶菴。乃不覺其爲古與時矣。

陶菴於此理儘粗。故外腴而中枯。望之蒼然。若可珍。咀之却帶稊。

無入心之味。

寫騷子語。不難詼諧點綴。祇恐太涉鄙俗。雖有尖巧之思。熱鬧哄堂。是村場笑府。非文人筆也。看大家運用。亦只得通行機趣。然迴不可及者。難其大雅耳。

閒閒散散。順筆勢爲欹側。而題自赴之。若無意於結構者。每至斷崖絕壑。便旋閒輕身瞥過。不覺其險。過後迴思。輒令人怛戰也。以題之情事。發我之憤論。悲刺。以我之章法。化題之節次。說詞。此是古人自立一家之妙。却是古人脫化於前人規矩之妙。

滕文公問章文云云。**評**簡括全文。極有法力。是古文筋節。却又出以俳偶。而自見高老。余每笑論文者。必以單行散體爲古。真不知文者也。

達心而傳。以沛然之氣。故循勢出險。皆有江河之觀。非支架補綴。

之所敢近也。

長章文看他開發迴絕處。議論與章法綜引處。敘事簡鍊不覺處。過接奄忽便利處。轉拗游行自在處。件件得子長之筋節。

魚龍沙石。流轉洪濤。銅鐵汞鉛。雜投丹竈。隨手變幻。自成一則古論。使題目融液其中。無復見糟粕煨燼之迹。及細按題目之腴理。無不密。體度無不稱。點綴無不完。又未嘗蕩溢域外。此真奇觀也。

長題以剪裁高簡而映帶不漏。稱妙手矣。然免不得一箇忙字。如飛騎趙驛。未嘗不經歷州縣。然無一州縣入其眼中。看陶菴長題文。何其閒暇。所以能閒暇者。得題中理要。而以奇偉思議行之。不沾沾以牽聯點綴爲長。而自然牽聯點綴入妙。此用意與調文之不同也。至其筆法之高古雄勁。又當別論。

起手換頭處轉拓得開則超遠不測轉關押尾處停蓄得住則悠閒有餘味不熟古文閒架出落無從得此筋節

段落平側題回斡周旋良工心苦讀之仍自然正大冠冕此老手善於變法出奇也要得其正詮處精實端凝此却不因法變

昔友高旦中嘗戲謂乞兒弄蛇歌若真讀書人唱來須各樣吾云正苦近日讀書人都作弄蛇聲耳一時噴案大噉讀陶菴而未嘗有顯者句文天然大雅信讀書人真是無所不可

其博雅皆從經術自得非若近人古典但本之時文者也故雖有疎處亦高於依樣葫蘆數等

周寧 **班** **晉** **章** **文** 云云 **靜** 所貴乎閱博君子熟于典故知古今制作之本與治亂之由能發先儒未詳之說則雖旁引遠據正見其通達大義腐豎每守死格嫌其增添議論余最不然其語然

增添不著理要。議論違謬聖道。却不可爲訓也。此文于疏敘開頗多補義。孫若士云。層極議論。文氣多漫。與動手不類。若其肝衡時勢。籌算古今。固與封建五等論並驅角力。余則謂層極而中理。益見其勁。安得漫正爲肝衡籌算。只在子厚士龍籬下。其病蓋不止氣漫也。

增補典制義例。是賣弄博核處。然多不著緊要。先輩大家非不能。蓋無暇及。亦非所貴也。

文章要看閒淡枝節處。正是肯綮。必有此。方見大家數。

不爲新奇驚坐之談。但按事入情。昌明剴切。令讀者如家人婦子商量甘苦。而生民原始。與聖人法制本來。無不通達。漢唐以來。孫此者。吾獨服陸敬輿。陶菴先生殆其流亞歟。

呂子評語餘編卷三

江西五家藁內摘錄

評藁獨詳於江右何也。呂子曰：吾於是乎有感也。三百年制義之作，壞於萬曆，極於天啟，而特興於崇禎，亦卽壞於崇禎。崇禎之興也，由江右，而其壞也，由金沙。當其壞也，不在壞時，每伏於極盛之際。於其興也亦然，由成弘至於嘉隆，非無小盛衰也。然理必本於孔孟程朱，而文必摹乎周秦漢唐宋，故雖小衰皆盛也。及萬曆之變，則不然，初變爲村師之講章，繼變而爲佛經語錄，是二種者，似乎異趣，而其實一家。蓋以俗學始者，必以邪學終。未有講章而不歸於佛經語錄者也。然其文實俚鄙，不足以塞學士大夫之意。天啟間，乃又變而爲子書，子書猶古也。如莊之奇、列之逆、管韓之雄峭、荀揚之勁深，彼又不能爲也。第剽掇其

纖詭險仄之語。以傳其佻鄙之思。甚至篇中無賊殺寇盜。卽不稱名搆。嗚呼。文章至此。可爲大亂之極矣。然究其淵源。實溫觴於弘正。中陳王之學。故曰。壞伏於極盛之際也。江右艾南英。千子。出萬曆之季。與共同鄉羅萬藻文止。陳際泰大士。章世純大力者。倡正說於天啟之間。論題則復稟傳註。體法則準諸先民。而又盡破帖括之習。直取周秦漢唐宋之文以行之。卽王唐歸胡之格調。亦鎔釋蛻解。而自露精華。天下翕然信之。於是崇禎初年。始知以古文爲時文。峰起瀾湧。名不一家。則千子之力也。方是時。金沙有周鍾者。復社之盟主也。其選文行世。亦與千子埒。然人品心術。固迥然沆瀣井泥之不同。卽其選文也。亦一誠而一罔。千子篤於論文。周則借以爲聲氣籠絡之用。故艾選持論。斷斷雖同席者不相假。而周則包羅遷就。無所不可。於門戶

豪盛之家。尤逢迎嬖姁。故艾當時卽爲世所欲殺。而周雖身敗名辱。至今猶有護惜稱道之者。其所操術然也。千子嘗從講於東林。爲復社者。亦傍東林之後。以故千子篤於同學。又篤於論文。不惜與之力爭。其譏訶切直。固有人所難堪者。一時聲氣之宗。皆大惡之。不以爲愛朋友與文章之道也。而直疾其異已。然以千子故。東林不可斥爲邪黨。乃嗾四方之附和聲氣者。環而攻焉。方反其說。以浮靡爲宗。以理學爲戒。蓋自是而崇禎季年之文。復大亂而不可救矣。自戊辰而辛未。而甲戌。文氣日上。此千子之說行也。至于丑而靡。而庚辰而癸未。遂蕪穢不治。則金沙之說行矣。故曰興於江右而壞於金沙。夫以天啟之極弊。而艾與諸子奮其間。及其與南中爭而亂也。則在戊辰己巳。正當崇雅黜鄭之時。而已音移律變。然則盛衰倚伏之故。不洵可鑒。

哉。于子之言曰。文章之道。自史記後。東漢人敗之。六朝又大敗之。至韓柳而振。至歐曾王蘇而大振。故文至宋而體備。至宋而法嚴。至宋而本末源流。遂能與聖賢合。斯言也。千古之特識。卽起左莊馬班韓柳歐蘇諸公於今日。無以易其說也。然而于子亦有未盡其道者。知以周秦漢唐宋爲文矣。而其爲講章佛經語錄。僞子之病猶在也。知以傳註爲理矣。而其爲陳王陽儒陰釋之根。猶未盡也。所謂楊墨之言不息。孔子之道不著。故一時之文亦止乎此。而不能駕軼乎古人。此則于子之所少也。天下之求上乎于子者。固當因其道而加精焉。卽欲攻于子之失者。亦必於此鍼其病而琢其瑕。躋當時之文於成弘嘉隆之右。則其足以壓倒于子不難耳。奈何不爭于子之所少。反取其鄙棄不屑事者以攻于子。是猶結羣羊而角猛虎。適自喪其生而已。

於虎何傷乎。黨力旣消。公論益出。千子之說。固可以傳信古今。而當時浮競之文。久已同腐草死灰矣。豈不悲哉。宋元祐之政。足稱盛治。惟能去熙豐之弊也。其不能上擬三代者。司馬韓富諸公之所少也。繼元祐者。不紹述三代。而紹述熙豐。則不惟失元祐而必至於宣和靖康矣。崇禎文字之壞。何以異此。夫一江右制義之盛衰。無足深惜。吾獨感崇禎之初。直足越成弘嘉隆。闢宋制以來之所未有。而爲諸浮薄黨爭所敗。不特不能興。且覆滅焉。豈古今聖賢之源流。有不可復振者與。抑氣運使然。所謂廢不可支者。於文字亦然與。然其爲升降得失之故。亦概可睹矣。此吾於江右之文。獨有感也。其附以楊澹餘何也。曰。以文品相近。且生同時。產同地。故并及之。無他義也。記。

羅文止

四家之中。獨大士名極噪。至今羣稱企之。固未必盡知大士之美也。震其氣魄。議論又多且快耳。次則大力。猶有推之者。亦驚其鱗角異衆。疑其爲靈者也。至羅先生。則知者益鮮矣。然而其文實踰三公之上。以其無色聲香味之可悅也。故民無能名焉。爾嘗序其品曰。羅爲最。陳次之。章又次之。艾終焉。問楊維節之品何居。曰。在章艾之間。已而曰。前評殊誤。羅爲最。艾次之。陳又次之。章終爾。楊較鬆薄。艾之識力高出前輩。非諸子所及也。或曰。昔者艾于子吳次尾諸家。亦嘗推羅爲第一矣。然其後譽漸衰。得毋日久之論爲是與。曰。不然。昌黎之文。李習之。皇甫持正。已極推尊。然至宋初。猶無信之者。待歐陽永叔出而後。千載無異詞。故近則以親信者而傳。遠必以明辨者而定。

竊聞四公之爲人也。陳曠朗而倣疎。章豪宕而鏘刻。艾則剛正簡

直而不能容物。惟羅沉靜澹易。獨無矜競之風。此四公之人品。卽四公之文品也。四公生平契密。然陳章皆爲南中聲氣所攝。致隙末於東鄉。而羅獨巋然。始終無少間。此又以文品驗人品。信曠朗豪宕者。易搖而沉靜澹易者。難動也。故擇友者。但觀其文。而其人。之性術。可得矣。或疑有文者。行多不逮。曰。無行之人。文雖佳。定有病在。人自不察耳。以上記言

四家之文。外間皆震大士而奇大力。文止之譽。頗黯淡。然其文。潔靜幽微典雅。不露聲色。多含醞。不盡之妙。不屑與人爭朝夕之榮。其本領甚高。三家不能上也。當時千子次尾爾公諸評。亦多以第一許之。絕非阿好耳。

三句文云云。其氣體則端凝和厚。其風采則典雅高華。真盛世之音。然此爲人所共見而易知。學之每成膚膩。蓋徒

從其氣體風采求之而不得其本也。須見其義理精醇處。皆經術之深。是王者儒者之道。更無一後世功利駁雜之意。攙和其間。尤豫章諸公所難耳。

致于每於拘處。借處。鑽穴。因鎖。引入正解。但恐後生效之。無中尋有。強生事耳。**評**粗中有細。拙處生靈。披沙得金。往往足寶。只恐後生讀之。悶塞無味。反致厭棄耳。若肯無中尋有。強生事來。便有一分生機。可救矣。此文止一服奪命散也。

思必入人之所不思。寫必出人之所難寫。刻苦之至。乃得明快。文止文於一切塵翳。并世間浮華。皆吐棄令盡。自闢清微一路。不容熱鬧人尋味。可謂峻絕。

清微瑩徹。絕不爲邪說所障。惟其明也。理明則如說話。淺淺淡淡。脫口輕便。而意味深長。是爲最上。

文止刻畫中理處。真有敲骨打髓之能。皆不走人心熟路。故驟覺生澀。久之味出矣。

上老老三句文云云。**艾千子**平實。但不耐咀嚼。**評**果平實。未有不

耐咀嚼者。此非平實。乃膚隔耳。凡語欲放活。只當於意思。言句內用縱脫。則道理圓瑩。乃真活也。若以文法說破。要會悟。要得指點之妙。卽非真活。反著不著相之相矣。

先輩只老實正講。而意思深厚。不覺其敷衍。是最上本事。虛含下意。便是隆萬後巧法。以隱約不著迹爲佳。若今人實此訣。便滿紙占奪。反成容易法門。敗壞古法矣。

艾千子題緒甚煩。當以簡淨畢之。**評**且不論煩簡。先須明白此理。分合貫通處。講得清切爲得。支行便是冬烘耳。

高著眼孔。境界甚寥邈。廣博自非恒見所云。讀朱子齋居感興詩。寄思物外。而不託仙佛之間。學者得此意爲難也。

語語似有餘閒。却都是題中筋節。無一語落開去。閒正是其筆妙耳。

宛宛摹寫。一轉一折。皆有幽微幻渺之思。以引之。使人不測。却味之百過而不窮。文境之仙也。

筆意超然。不爲理題所困縛。是文止勝處。但能切理而超然不受困縛。乃爲至耳。讀者須於此得箇進步。

考諸三聖句文云云**文千子**高華典重與題相配**張爾公文情微**

削正少典重評艾所取在氣骨張所求在神韻故典重二字亦移步換形要皆未爲至論理鴻深則氣骨神韻自然典重但於氣骨神韻求取不可得也然視世間以濃俗詞句爲典重者二

家之論迴絕矣。

老樸醇古。氣脉深厚。此種文極難看。時髦反覆數番。終如嚼木札耳。於此有箇見處。身分已長進矣。

著眼在題目之外。盤旋激盪。不使一筆粘著。亦不使一筆踈離。亦不使一筆游衍。亦不使一筆徑盡。若颺在千萬里。不可思處。落頭滴滴都入眼裏。此種非細心靜會。不能急切領略其妙。

文止文總無一點浮埃。無一絲烟火氣息。澤其行墨。清齋微哦。生人遠意。間有理不精穩處。誤其經營之苦。然其思致已迴絕矣。**天下有道四節文**云云。**國**相題之節。滕自立行陣。出奇渡險。寂然不覺。乃神勇也。其勇在智略。不在戰鬪。故舉艱鉅如輕纖。令人翫其營壘處。足生千載之思。其意有餘也。

清空遠引。機致飛流。他家滑薄。一過意盡矣。文止却耐人耽玩。其

味厚其便利中有澀蓄也。

其言必令人微會乃得足知其烹錐之苦。

陳大士

大士爲文以夸多鬪捷驚人故多湧成少精構多段幅之奇少全體之美今集凡有一篇半首數比之佳固無不錄其有大謬於理者恐後學別見反以爲奇而效之則誤世不小故亦抹存以見瑕瑜之不掩。

近日坊選好竄改刪割人文字然以施於時下之人猶可今且汚及先輩不可也時下之人學問淺薄雖有稱爲古者其底裏不過講章時文而已正如方言土俗爾汝共諳然猶有高出選家者不足以服其心也况乎先輩之文源遠流長雖極粗率之調觸戾之詞必有來歷一篇之間自成片段與今之聲音笑貌渺

不相及。古人謂身坐堂上，乃足判堂下之是非。今豈特堂下哉？直坐之門外者耳。乃欲更反門內堂上之言，不亦異乎？大士之文，粗服亂頭，不無敗闕，亦西施之病，捧心成妍。奈何以講章時文之鄙穢，闢廁其間，續狗於貂，點金爲鐵，不畏天下後世，或有通人笑罵耶？

以上
記言

大士先生文，人但驚其奇縱，不知其法脈細淨處，是爲老作家。凡一字入其手，必有兩義，文卽有八比，或多排小比，亦必每比各有義，不犯合掌架屋之病。義雖多，局雖碎，而章法首尾有體，股法次第相生，定一氣呵成，轉轉見妙。此皆古文正法，非抄套時文之所有也。又有一種略去畦町，標舉指歸而已，得要妙者，有淡點冷逗，疎疎若不經意，而迴不可及者，有直破中堅，樹立奇偉而餘地輕置不顧者，此皆古文之變別。又法之最高者矣。特

其理求超而每失之邪異。論求新而每失之駁雜。入情過快多俚俗之談。發揮急盡。傷神蘊之妙。艾千子譏其心粗手滑。此則先生之所不得而辭者耳。

一線到底。而翻騰跌宕。不見其針脚穿度之迹。此法極精。熟於史漢韓歐。乃得其妙耳。

不沾沾比櫛排組。但曉暢立言大意。於肢節關紐處。提揭得了了。自足領略其妙。然須手筆高古變化。

大士手筆。但見猥陋耳。

徒講虛法而無

因不失其正句文云云。戚价人機法絡繹之妙。所不必言。所難者。中講史事而無一事。及史蓋吾設言於此。而百世事無不該。以是徵奇博耳。今之作者。則胸中先擬史中何人。其人何事。而後發而爲文。宜其所指彌偏。所舉彌漏也。所謂今人擬史中何

人何事。猶是崇禎間文人語。近亦并無此擬作矣。要之講史學作四書文義。已落下乘。故朱子力辨東萊同甫之失。如大士所言。亦不過較他人多擬幾人幾事耳。所謂吾設言於此。而百世事無不該。除是聖經始得。如易卦象爻足盡宇宙之蕃變。惟其理至也。史學只就事上商量。每反以古今成敗利鈍掩却自然道理。雖或有億中之辨。亦只在人欲功利上分明。安能令百世事無不該乎。

圓悟之言易工。切實之言難到。

山無峰巒起伏。卽爲頑山。水無波濤蕩洄。卽成死水。文之佳。正在起伏蕩洄處得意耳。

每從人生有初大源頭說來。道理極大。通體爲之劃然。文字不具此識力。必不能到古大家門下。

文章須得大頭腦。則下面意理細曲處。皆包貫得到。從瑣碎枝節尋湊合之法。雖綳布成局。不能達也。

先輩極奇橫文。於法律定不走作。

維斗稱大士文。皆自傳註大全及先輩中來。而特故高巍其貌。奔放其勢。幽渺其思。以示不苟同於先輩。使人不敢以傳註大全及先輩之迹求之。余謂不然。大士之高巍奔放幽渺。自有佳有不佳。其佳者。正可以傳註大全迹求。而深得先輩變化之法者也。其不佳者。則故爲其貌其勢其思。而實無當於傳註大全。同於先輩耳。

大士文中有雅有俗。須別出之。其俗非世間甜熟之俗。乃老辣過也。出講義語錄之俗。此最難辨。文人須留意也。

大士文粗處儘多。其著意似不著意。閑中筋節。却別有光彩。如柳

州於鉅鋤潭西小丘剗草斫榛而後嘉樹立美竹露奇石顯正賴善遊者耳。

立於題外推論取意刻斲易耳得省渺泐泐烟波微遠最難然畢竟是討便宜法門先輩定入虎穴取虎子其神韻又別此非大士諸公所能也。

大士文全在題之空際著思議看其出落轉捩結束處見作家大用讀者當細玩之此卽古文手法也然題之實際却多輕瞥過是他做虛神不暇及却正是他本領不濟處若先輩定發揮得實際精足而於出落轉捩結束處又得古文出色機趣此其所以爲至也。

長題雜碎題看其搏挽有法點逗有手筆串照有巧思已足以豪若總攬大意更有宏論奧議則作家之體備矣。

文章太求雋快。未免落纖纖。亦何害。但纖則必傷義理。

筆筆放教活。放教鬆。愈活則真。相愈圓。愈鬆則結束愈緊。精悍中仍寬宕有餘。淡折有味。此又非粗疎貌古者所曉。

古氣盤結而成。有勁矯之力。有悲壯之音。又非衰颯淒涼所從出。乃所謂鈞天之奏也。

鎔鑄全題。自造鑪範。隨手匠心。皆歸妙法。此種文若不精熟於古。從何夢見來。

利弊所以然處。能鑿鑿言之。千人共曉。看世間再說不明白人。真是氣悶也。

三疊文。法人所厭。大士用來。却可喜。只是意思多。不是文法湊合也。

沿山驀澗杖策遊閒。不過領雲烟丘壑之勝而已。忽有奇禽怪物。

髯翁毛女隱現其前然後驚爲神仙之境。

大士文每不必其有甚精之義但隨文勢轉捩爽然如人人欲出諸口而不能遂而此能出之又無不以如此出亦無難而試爲之又遂也。

凡能精於跌法則題之虛神無所不出屈曲無所不盡矣但其爲弊也則未免有剜肉成瘡之病是在善學者耳。

大士亦復摹倣口角却不似近人軟猥惡俗正如弋陽與崑腔不必較曲白倣作只排場鑼鼓間雅俗迴別矣。

直談史魚章文

云云

評原是上下兩截出後作合論其法甚井然

只爲筆法纓帶花簇局陣自生奇幻令人眩惑不能界畫耳然串插之法有巧有弊不足爲作家驚歎只一種情致低昂頓挫淋漓不窮隨筆起伏曲摺皆成神趣此真子長之遺而韓歐得

之以千古者也。

圖繪抑揚自有纏綿斐妮之妙。自蔚宗以還只杜牧之李義山能拾其遺韻。

大士文語多奇創。沓涌而出。其粗疎有不暇擇也。學者慎取之。得其雄駿。足以破凡猥陰蒙之病。

每以淺俚之論立說。而使人忘其淺俚。筆高故也。然學者不可不知其淺俚。

用意必名雋。舉止營構迥絕凡近。如入深山。遇異人。冠劍服食。無一不起上古之思。

實講處多苦無精義。此所謂本領雖奇才博識不能襲取者也。就大士所見發洩自有精力。若深切義理其光芒不知更復如何。故學者貴乎見道分明。卽爲文字言亦非此不可也。

熟於人情事故。發揮明切處。至理亦出其中。

淋漓痛切。適宕鬱沉。得歐曾之神。方有此種景致。此不可以文法套借者也。

筆力高古脫變。故出沒穿插。皆有奇趣。

朗朗如聽鄉談。了了如開家信。此大士先生不著意而自成一奇也。惟其自恃此奇。卽亦是不精密的當之所由來。

分門古今類事云云。聖賢之道。不外人情物理。於此道得明快。卽成至文。同也。第情理透矣。而其所以克治宰制之要。不本之聖學。則情理愈透。愈流雜百氏之術。未爲得也。玆則醇乎儒矣。

其結撰純是古文。雖有粗疎處。今庸目不敢指摘。亦文中之魯連太白也。

凡文字要過火求新。每於理上別生病痛。看先輩文便無此蹺蹊。一味作諧誕之思。不復管題意是何理會。令讀者眩其奇而喜其妄。不妨以天地聖言佐我戲詭。此弊病豈淺小者。然皆自漆園。葱嶺得來。文人每溺之而不知返也。

題義全無體認。其病正坐題外運題。題外運題。只爲不曉題中。道爲無聊之策。

短幅文字。看其寬閒幽宕。縱橫突兀。有多少境地。

論極情事。必有根據。根據經術者。精當典雅。根據後世史集者。多不合於理。而情事亦謬。

典制茂實。非所難也。進以大氣。緯以宏議。錯以峭辭。而鉅麗之觀備矣。

近日一種議論。謂文字忌入衰亂凌夷之言。而務爲諂阿吉祥。自

稱冠冕有體。是秦始皇之碑銘勝於三代之謨誥也。

極繁重堆垛之題。入大士手。如孤帆破浪。線索在我。風水由他。下峽橫江。千里瞬息。旁觀爲之驚喜。舟中人甚平平無奇也。

六朝琢句。效之每落纖靡。三唐長調。學者亦嫌俳悶。文家遂戒不可爲。而并薄古人。不知其自少本事耳。金丹入手。雖鐵石皆能開點。如陸宣公。偏以俳調見奇。永叔子瞻。時爲工句。而氣體自高。何嘗貶損其光芒哉。大士賢聖之君作。多用六朝唐句。而渾浩流轉。不見其組鍊之迹。亦其流亞也。

文之奇橫者。以其變化於法度之中。不可捉搦。而自合。乃爲真奇。橫耳。非茂葉繩尺之謂。文之有體。猶人之有頭目手足也。頭未訖。而手已生。目下降。而足上出。豈復成形貌哉。

其心尖。其手快。故能層折批剝。無所留剩。心不尖。不能入。手不快。

不能出天下名區奧迹。爲鈍根封錮者多矣。

機法高。議識警。大士此種。得古人意深。人偏賞其放誕。不善取大士者也。

風神摇曳。如江風送烟柳。感人正在無定處。

以粗淺形精勝。令人意朗。此是大士長技。

每從俗說。凡情刻出。痛苦深激之言。如名優演淺俚劇本。自能令觀者墜淚切齒。非劇之妙。優之摹擬神也。

于子謂大士文。句字多俗。俗字最確。但其俗在識見。議論不在句字也。以其句字爲俗。則彼有詞矣。古人粗枝大葉。每不揀擇句字。然識見定正大。議論定精醇。

大士文有初閱甚莽蒼。細玩數過。亦復多幽勝之致者。如入筍簾中。忽拾香樹。如歷蕪穢處。時遇芳蘭。要是異珍。不肯近迹。正耐

人斷採耳。

清辨洮洮言短旨永。此摹晉人醞藉也。一雜俗詁失其妙矣。

大士文每善於轉曲處。別出慧解。妙趣相生不窮。

凡文與題義及上下文不相比附。卽有奇情偉論。總屬粗疎。看先輩不肯如此。不是不能施設。施設來徒成痕瘡。故不爲也。

大士文轉折處極靈警。但好爲尖新創闢之言。反成小家子輕薄兒套頭耳。

章大力

讀章文常落其皮毛而搯其骨鯁。但知章爲子派。此爲皮毛所掩也。其回斡雄勁。閒架簡潔。自得古大家之遺。而思力刻深。每於奧窔族賸之間。別開幽徑。省渺冷峭。其味無窮。第不耐粗心人領會耳。

記言

章公文以刻削堅果爲宗。意之所極。無微不入境。人力盡。亦無留餘。得之子家爲多。故當時以爲子氣。然亦自成一子。非抄套子書爲之也。其自信過銳。多不顧其安處。頗好逞杜造之見。是則其短也。

振筆直書。如寫家信。如與鄉里人話。故津津不已。曲折飽滿。皆真意所自生。更不須脩飾一句。大家最上品也。

看題字不甚親切。故時見腐談。凡腐談皆理不真也。

仁遠乎哉。章文云云。**文千子**。平常耳。然間有醒語。**語**極平常中有醒語。先輩之妙盡之矣。江西社中正多了求勝出奇一轉耳。要亦平常中無真滋味故然。

大力文大開大闢。大轉大摺。勁力強詞。瀾翻霆碎。真得老泉之悍。東坡之雄矣。若與論題目道理。卽索然氣盡。且縱與逞一奇快。

耳。

文。至東漢。愈排愈疎。愈整愈稚。愈新愈俚。大力於時文。恨未窺西京以上耳。然據其詞氣。亦當在王充論衡徐幹中論之列。嗟夫。天下不知古文。此腐儒之罪也。天下知有古文。而不知辨西京之古。東漢之古。則亦近日名人不讀書之罪也。**國**文之古。在神理。不在辭句。並不在俳整散行間也。自秦漢魏晉六朝唐宋來。皆有其美。有其病。豈得舉一廢百哉。干子之言。似高實過。善學古者。多讀書自會耳。

文有短短數筆。而結構段落。一氣盤迴。其中丘壑甚邃。局勢甚寬。閒此大家小篇中藏巨法也。

學公穀。須得其用意深細刻銳。與筆法峭冷變逸處。不徒摹肖口角也。文字中自有此種妙境。干子以爲蝸徑蚓穴。終傷大雅。則

不足以極古今之能事矣。

至深極微者。出其手下。不覺鬆脆新鮮。見者以爲我意亦爾。而百計不能達。非其口吃指攣也。心粗則渾耳。

行夏之時句文云云**改千子**此等題蘊。人人所知。人人能用。何必

大力。且能不用星官曆家言。方佳。**語**亦不必盡去。人人所知所用。但就其中取正大之理的確之說。而發明聖賢實用之至道。乃爲學者之文。若但臚塞星官曆家子書稗說。以逞奇博。而無當於道。是爲浮薄之文。人云亦云。膚雜無意理。則村教書之文而已。此則意欲爲學者而不能。亦未免出入於後二家。固有之矣。

文人好搬演舊話。大約有二故。一則正當道理不充足。借以支架。躲閃。一則要聾聩天下庸陋耳目。然庸陋雖震而不敢宗徒爲。

老學所訶摘。故不足爲也。

艾千子古人爲文。必曰文章爾雅。訓詞深厚。所謂爾雅者。無俗字。無鄙字也。三字經。四字句。強學公穀。而詞句皆鄙俚。不成文。看大家文字。從無此。評謂文須爾雅誠然。然古文自有似樸拙近俗而實高古者。又不可以一格熟眼觀也。卽是作語句。亦自古文來。第下字有欠透當者耳。直曰鄙俚。則大力不服矣。世間惟假爾雅而實惡俗一種。爲最不堪耳。

大學之道節文云云。**艾千子**意境粗淺。何不澄氣凝神以出之。評亦非氣不澄。神不凝。且請先明理耳。理不明。澄氣凝神何益。越澄凝。越差遠去。

哭畏民志二句文云云。**艾千子**上句講太多。下句講太少。評且不論講得多少。先須講得是。若是時多亦可。少亦可。不是時多少。

總沒帳其病只坐好巧言纔弄巧便亂道矣。

不肯體認註理欲自撰新奇未有不成都繆者。

文章有禪家殺活縱奪之法如大力不得於心兩段文先說破都不可是殺法前半放可字是活法趁他可處儘箇盡是縱法卽從可字殺出不可來是奪法。

文字到理透處真能推排豪傑展拓萬古其機陣之靈變骨力之蒼雄又因之而益奇。

逐步刻劃每成粘著之病求巧得拙矣行文得大意所在屈曲間自然靈變。

大力文實好逞其博雜千子砭之最中其病然博雜不足病病於此理無定盤針便爲博雜用不能用博雜矣。

萬物皆備章文云云文千子此等文在淺學者讀之必以爲古以

爲削。吾正病其不古不削也。從古未有以斲削爲古者。亦未有以減字爲削者。古者莽蒼樸拙之謂。削者峴然千仞壁立。無可攀緣而上之謂。以減字琢句爲古削。但見其稚耳。鄙耳。無節奏頓挫。無波瀾耳。**語**于子所貶者。以語句言耳。抑末矣。題之理解全不是。又何論語句哉。若以文論。亦不可不謂之古削。第其古削出佛經語錄。及後世子書講說。非先秦以上之古削。故不貴耳。看周秦文字。乃知古削之真妙也。

能使題中虛字顛倒飛舞。如蝶弄遊絲。燕翻花片。驚疑無定。可玩而不可捉搦。是爲筆妙。

艾千子

先生文初亦以纂組古博爲奇。已而漸趨平淡。後於平淡中復發憤刊落。爲樸鈍硬瘦之業。其品益高矣。論者不知。則以爲江郎

才盡也。先生極恨歎。每形之書尺。蓋文品愈高。則人愈難曉。固無足怪。然在先生亦有一間之未達者。但於氣體景象之間。講究極精。而指歸所以然之處。多所疎略。故微見其外強而中乾。質清而味薄。使於此更上一層。豈諸子敢望其項背哉。卽至今無一人歎賞。其足以陵鑠古今者。可自信也。記。

自有制義以來。論文者甚多。然吾以爲知文者。先生一人而已。於古今體格之變。無所不知。故其見處極高。非餘子所及。所少者。理境不精耳。其自作也亦然。文品老而益尊。得古人皮毛落盡之妙。自謂一意掃除。覺古人深處頗有所窺。漸有潦水盡而寒潭清之意。且有詩云。昔友陳與羅。巨刃摩天揚。蛟龍盤大幽。鬼語爭割強。凌獵經與史。嘈雜奏笙簧。近者思簡淡。淨洗十年藏。先民有典型。震澤方垂裳。古貨今難售。剗羊亦無益。誠確論也。

但理境不精則簡淡高老無有至味出其中未免外強中乾時流因謂江淹才盡先生甚不平斯語蓋所爭祇在外面一著斯先生之高於俗眼者雖有古今雅鄭之不同亦尚落皮毛上事耳。

先生有云目之所見有物封之不能盡環堵至江天萬里目盡孤鴻青山一髮杳然天際爲平生於遠耶抑平而後遠也當時雲間諸公極詆其說要是雲間諸公未到此境耳文章到平樸簡淡最難交先生於此直入古人之室故其衡論前輩皆超越凡近其自作未能竟造至處爲是理解未徹本領欠精實要其於文字品類非後生所能拍其肩背也。

文無論虛實虛中有厚味不落空疎枯寂實中有真氣自然官止神行兩種境界都到方見作家本事。

雲觸峰而迴盤。水遇石而激蕩。皆有必赴之勢。故中間變態環生也。

于子文亦雜語錄機鋒。要之萬曆間腐爛。天啟間鬼怪。其源流病痛都從此得來。

老樸之氣。千里在望。但未免茆葦亦樂生曠衍耳。故文章必須丘壑。長江峻嶽。亦丘壑之極致也。

只是實做題意。則語脉自得。摹演口角。則題意無著。而語脉亦假。作家得法在此。

文章道著筋脉處。不在多言。犁然有當於心。

于子文實講處。不無粗。粗處却見老境。今人不能粗。正復近他不得。

平正老淡處。正有滋味。所謂朱絃疏越。大音希聲者也。

安頓段落。穿插極有法。其轉折收放。筆力又極天矯。憑他顛倒拈弄。串綰作巧。而無一言之傷於理。此爲作家耳。

老樹槎枒。不必有虬枝密葉。而氣色自鬱然雄異。其根柢有力也。

楊維節

先生文刻峭清寒。固年數不永。亦勢不能多也。

先生之文。善於用遠。含毫落墨。渺然殊不著題。而曲摺起滅。則皆題之腴理骨脉也。惜其本領出於禪。故不能唐突先民耳。要此一種文境。雖先民歟。未歷矣。問同時如楊機部伯祥。亦江右之爲古文者。何爲不與曰。機部得蘇門風力。然其勢太直。氣近浮。要其精蘊固少矣。微按之。律亦不細澹。餘文雖極變逸。然藏針線於繡文之中。於成弘規矩。固森然也。江右諸家。正以其得先正法耳。先正之法。古文之真法也。以計

學而時習章文云云評於下兩節見得地位甚峻消息甚微斷崖
凍瀑間聞幽香如縷若遠若近踏冰破雪曲討微尋乃出疎梅
數點如是如是所惜者首節未得真地位真消息連下面止到
得孤巖邃洞之奇與三島十洲間所有正不同耳然已離塵世
恒觀矣。

我讀其文如遇其人在散仙古衲之間所餐者松椽耶雲霞耶所
行遊者荒山深海耶所爲伴者玉女六丁虯龍馴虎耶俱莫之
知雖然其位下兒孫必墮鬼趣

意鍊而得深氣鍊而得高局鍊而得脫灑語鍊而得精微鍊之一
字文章之妙訣也然以語枵腹捷口之人教他鍊箇甚麼。

維節文清微淡雅於熱鬧中別結一世界。

總無浮俗之情滓其腕下然頗多粗淺見識攔踞胸中在維節固

自以爲從刻鍊危苦中自得之極致。與他家紙上研窮者不同。然這上面更有在也。

立喫力之局。而無實力量。以駕馭之。徒見縑布之苦。此能驚愚俗。而不能驚老僧者也。

飛仙去來人間。人以爲變詭狙嚇人。不知他只自由自在耳。爲甚諸人不肯自由自在。只爲公等滿身都是塵土俗氣。自己纏縛難解也。○只可惜於本領欠親切。故道來境象。不失之過高。卽失之粗。若此處理會仔細。世間更有何等文品能出其上。眼前空濶。指上蕭疎。是維節勝人處。

但有不中把子處。若其中的時。不第能穿七札。直洞穴輪王九重鐵鼓。

文氣極高。曠靈幻。而見識粗在。故少古人大境界。而自闕一塗。

其思致幽微而筆情杳渺尋常路陌自出新奇則所謂自是君身有仙骨世人那得知其故

玩其用筆超脫忽去忽來有意無意有迹無迹如神君之至靈風肅然舟泊中流旗翻墜雨可思不可期俱在雲霞山海之外天下依口學舌之徒從何處乞生活哉

渾浩流轉中復具孤情曲致淡韻幽姿此大家之所未有也

凡文章輕重看用意手法所在不論分股及字句多寡也作者原未嘗有重何句意但做來却已如是此亦太討好喜小巧不精於古法而自抒心得之弊

筆勢天鬣機局迴盤以漢人之道峭行宋人之潤疎故峻而不寒雄而不湯

文章意致貴極高凝潔淨如清秋登嶽顧視莽蒼咫尺萬里皆成

沆瀣之氣。然於嶽麓之郡邑。亦不必了了也。

惟天下至文句文云云孫若士文字大處在養脉。細處在淨詞。此

文小起內將題旨說盡。是不養脉之過也。篇中家人父子君民親友種種雜見。此不淨詞之過也。**謂**小起爲首五字作勢。不爲說盡中後拉雜引倫類來講。不無粗穢。然亦多所發明。吾止悵其發明未盡爲未甚真耳。亦不爲不淨。古人說道理樸實頭處。儘亂頭粗服。葉大枝疎。不似後人含糊活蛇。然其理旣真。愈盡愈渾厚。糟粕煨燼。隨手拈來。無非至寶。後人講究淨詞。其所吐露不堪噉咽。故文之精粗。以理爲斷。不關詞也。孫評故爲庸流說法耳。

於本理無所知。亦更不求知。只就自己意見。造爲夸誕之言。則但有粗妄而已。

全理盡在隱躍間。而烟遮雲護。止顯當面峰巒。此文章掩映含蘊之妙也。

章法離奇。似整實散。一氣踴躍。機勢相生。曲旋直下。莫不有自然不可捉搦之妙。此非變法。乃精於古人之法者也。

渺然落筆。定從人思路幾層外。破碎穿穴而出。故極熱鬧潤綽之題。入其手。定別有深微之致。

維節文清微靈湛。極盡幽思。惜解題不的。雖有名理。亦多玉卮無當。故行文以看書爲主也。

呂子評語餘編卷三終